

आकाशवाणी

Evening Dogri (NSD) Bulletin

29-07-2025

खबरां

- राज्यसभा च आपरेशन सिंदूर पर अज्ज विशेष चर्चा शुरू होई।
- लोकसभा च अज्ज गृह मंत्री अमित शाह होरें घोषणा कीती जे पहलगाम आतंकी हमले च शामिल 3 आतंकवादी आपरेशन महोत्सव च मारे गे ना।
- मणिपुर च राष्ट्रपति शासन गी होर 6 म्हीने लेई लागू रक्खने आस्ते प्रस्ताव, गृह मंत्री होर राज्यसभा च पेश करडन।
- केंद्री शिक्षा मंत्री धर्मेन्द्र प्रधान होरें आखेआ ऐ जे नमी शिक्षा नीति 2020 राएं विकसित भारत 2047 गी हासिल कीता जाग।
- रक्षा अनुसंधान ते विकास संगठन नै ओडिशा तट पर प्रलय मिसाइल दे दो कामयाब परीक्षण कीते ना।
- अज्ज अंतरराष्ट्री बाघ दिवस मनाया जा करदा ऐ जेदा मकसद अंतरराष्ट्री स्तर पर बाघें दी हिफाजत बारै जागरूकता गी बदाना ऐ।

<><><><><><>

RS Op Sindoor

पहलगाम च होए दे आतंकवादी हमले दे परते च भारत दे सशक्त सफल ते नतीजाकुन आपरेशन सिंदूर पर राज्यसभा च बी खास चर्चा होई। रक्षा मंत्री राजनाथ सिंह होरें चर्चा दी शुरूआत करदे होई पहलगाम च 26 बेदोसे लोकें दी बेरहमी कन्नै हत्या करने आहले त्रै आतंकवादिएं गी जम्मू-कश्मीर च मारी मकाने आस्तै भारती सेना ते सुरक्षाबलें गी बदाई दिती।

<><><><><><>



RS Manipur

मणिपुर च राष्ट्रपति शासन गी 13 अगस्त 2025 थमां 6 होर म्हीने लेई लागू करने आस्तै कम्मकाजी सलाहकार कमेटी नै प्रस्ताव पर चर्चा लेई मंजूरी दित्ती ऐ। राज्यसभा दे उपाध्यक्ष हरिवंश होरें घोषणा कीती। गृह मंत्री अमित शाह होर मानसून सत्र च गे मणिपुर च राष्ट्रपति शासन होर बदाने आस्तै प्रस्ताव पेश करंगन। मणिपुर च इस बरै 13 फरवरी गी राष्ट्रपति शासन लाया गेआ हा कीजे मुखमंत्री एन बिरेन सिंह होरें अपने ओहदे थमां इस्तीफा देई दित्ता हा।



NEP-5 years

राष्ट्री शिक्षा नीति 2020 गी अज्ज 5 बरै पूरे होआ'रदे न। एहू शिक्षा नीति भारत दे सबभनें स्कूलें गी ज्ञान हासल करने दे ऐसे केंद्रें दे रूपै च बदलने दी योजना ऐ जित्थे शिक्षा यानि तालीम छडी कताबें, नम्बरें ते जानकारी गी रटने तगर गै सीमित नेही रवै, सगुआं विद्यार्थी स्कूलें च पढाए जाने आहली पढाई, इक-इक अक्खर ते ज्ञान कन्नै अपने जीवन गी लैस करन ते पूरी चाल्ली सक्षम ते ज्ञानवान बनी सकन। स्हाडे संवाददाता नै जानकारी दित्ती ऐ जे पिछले 5एं बरें च इस नीति तैहत मुख ध्यान शिक्षा बवस्था दा मुंड तैयार करने पर दित्ता गेआ ऐ जेदे नै शिक्षा मती समावेशी, विद्यार्थी केंद्रित यानि विद्यार्थीं दी समर्थ ते जरूरतें मताबक ते भविक्ख च कम्म औने आहली इक कीमती सरमाया बनी सकै। राष्ट्रीय शिक्षा नीति 2020 दा असर कई असरदार सुधारें दी मदद कन्नै हर पास्से नजरी आवा करदा ऐ। एहदे तैहत निपुण भारत ते विद्या प्रवेश जनेइएँ पैहलकदमिं दी मदद कन्नै देसै दे 8 लक्ख 90 ज्हार स्कूलें च 4 करोड़ 20 लक्ख विद्यार्थीं गी फैयदा पुज्जा ऐ।



BuddhaAmarnath

बुड्डा अमरनाथ जात्ता दे पैहले जत्थे नै श्री बुड्डा अमरनाथ जी मंदर च मत्था टेकेआ। 901 श्रद्धालुएं दे जत्थे दा मकामी लोकें आसेआ सौआगत कीता गेआ। जात्तरा पुंछ कॉलेज ग्राउंड आहले आधार शिविर थवां अज्ज बड्डलै शुरू होई ते मंडी पुज्जी जित्थे मकामी लोकें उंदा जोरदार तरीके कन्नै सोआगत कीता। श्रद्धालुएं पूजा-अर्चना कीती ते पूजा थवां पैहले गौरी कुंड च पवित्तर स्नान कीता। आकाशवाणी समाचार कन्नै गल्ल करदे होई श्रद्धालुएं अपनी खुशी जाहिर कीती ते जात्तरा दे इंतजामें पर संदोख बुज्जेया।



DRDO

रक्षा अनुसंधान ते विकास संगठन-डी.आर.डी.ओ नै प्रलय मिसाइल दे लगातार दो कामयाब परीक्षण कीते न। एह परीक्षण 28 ते 29 जुलाई गी ओडिशा दे डॉक्टर ए.पी जे अब्दुल कलाम द्वीप दे कोल कीते गए। इनें परीक्षणें कन्नै प्रलय मिसाइल दी समर्थ ते सटीकता दी पुष्टि होई ऐ। डी.आर.डी.ओ आसेआ विकसित कीती गेदी प्रलय मिसाइल स्वदेशी निर्मित ठोस ईंधन कन्नै चलने आहली मिसाइल ऐ जेदे च अती आधुनिक प्रणाली लाई गेदी ऐ। इस मिसाइल च कई प्रमाणु वार हेड्स गी लेई जाने दी छमता ऐ। रक्षा मंत्री राजनाथ सिंह होरें डी.आर.डी.ओ, सशस्त्र बलें ते उद्योगें गी इनें कामयाब परीक्षणें लेई बधाई दिती ऐ।



Thailand-Combodia

थाईलैंड ते कंबोडिया दे सेना कमांडरें अज्ज आपूं च गल्लबात कीती। दौनें देशें दी सीमाएं पर फिलहाल शांति बनी दी ऐ ते विस्थापित होए दे नागरिक बल्लें-बल्लें परतोन लगी पेदे न। सीमाएं पर रमानदारी 5 दिन चली दी लड़ाई मगरा घोषित कीते गेदे संघर्ष विराम दे बाद कायम होई ऐ। थाईलैंड दे कार्यकारी प्रधानमंत्री ते कंबोडिया दे प्रधानमंत्री होरें कल मलेशिया च मलाटी कीती ते

युद्ध विराम पर सहमति प्रकट कीती। एहदे शा पैहले दौनें दक्खन पूर्वी एशियाई गोआंडी देशें बश्कार 5 दिन चली दी लड़ाई च घट्ट शा घट्ट 38 लोक मारे गे जिंदे च ज्यादातर सिविल नागरिक हे ते त्रै लक्ख शा मते लोक विस्थापित होए।

<><><><><><>

International Tiger Day

अज्ज अंतरराष्ट्री बाघ दिवस मनाया जा'रदा ऐ। एहू दिन पूरी दुनिया च हर साल 29 जुलाई गी बाघें दी साम्भ-सम्भाल ते उन्दे कुदरती रौहने-बौहने आहले वातावरण गी साम्भी रखने बारै लोकें च जागरूकता बदाने लेई मनाया जंदा ऐ। केंद्री पर्यावरण ते जंगलात मंत्री भूपेंद्र यादव होरें नमी दिल्ली च इस मौके पर नेशनल जोलॉजीकल पार्क च लाए गेदे इक समारोह गी संबोधित करदे होई आखेआ जे प्रधानमंत्री नरेंद्र मोदी हुंदे नेतृत्व च देश च 11 नमें बाघ संरक्षण रिजर्व कायम कीते गे न ते इन्दी गिनतरी हून 58 होई गेई ऐ जदके 2014 च देश च 47 टाइगर रिजर्व गै ऐ हे। उनें अग्गे आखेआ जे भारत अंतरराष्ट्री स्तर पर शेर प्रजाति दे जीवें दी हिफाजत लेई समझौते पर कम्म करा'रदा ऐ जेदा मकसद दुनिया दे 97 देशें च शेरें दी 7 प्रजातियें दी साम्भ-सम्भाल करना ऐ।

<><><><><><>

US-China Talks

अमरीका ते चीन दे अधिकारिएं अज्ज स्टॉक होम च दुए दिन बी गल्लबात जारी रक्खी जेदा मकसद दुनिया दी दौनें बड्डी अर्थ बवस्था आहले देशें बश्कार आर्थिक विवादें गी हल करना ऐ। अमरीका दे खजाना मंत्री स्कॉट बैसेंट ते चीन दे वाइस प्रीमियर ही-ली फेंग होर गल्लबात च हिस्सा लै'रदे ना। डैलीगेशन स्तर दी एहू गल्लबात कल बी स्वीडन दे प्रधानमंत्री हुंदे स्टॉक होम च दफतरै च 5 घंटे चली ही। गल्लबात दे पैहले दिन दे मगरा दौनें पक्षें कोई बयान नेई दित्ता। एहू गल्लबात राष्ट्रपति ट्रम्प हुंदे आसेआ यूरोपीय संघ कन्नै तारें कीते गेदे सभ्भनें शा बड्ढे बपार समझौते दे बाद होआ'रदी ऐ।



HP-Rains

हिमाचल प्रदेश च भारी बरखें करी मंडी जिले च त्रै लोक मारे गे न ते 1 लापता ऐ। मुखमंत्री सुखविंद्र सिंह सुक्खू होरें इस हादसे पर दुख व्यक्त कीता ऐ। मौसम विभाग नै 4 अगस्त तगर प्रदेश च भारी बरखें दी चेतावनी जारी कीती ऐ। मंडी जिले दे डिप्टी कमिशनर अपूर्व देवगन होरें दस्सेआ जे बदल फट्टने करी होए दे हादसे च त्र'ऊं जनें दी मौत होई गई, जदके 1 लापता ऐ ते 1 व्यक्ति जखमी होए दा ऐ। उनें दस्सेआ जे राहत ते बचाऽ अभियान जारी न ते घट्ट शा घट्ट 15 लोकें गी सुरक्षित कडुआ गेआ ऐ।



Chess FIDE Parliament

संसद दे दौनें सदनें च फिडे महिला शतरंज विश्व कप-2025 च भारत दी शतरंज खडारन दिव्या देशमुख आसेआ जित्त हासल करने दी सराहना कीती गई। राज्यसभा च उपाध्यक्ष हरिवंश होरें आखेआ जे दिव्या देशमुख नै विश्व स्तर दी प्रतियोगिता जित्तियै देश दा गौरव बधाया ऐ। उनें आखेआ जे दिव्या नै बड़ी घट्ट उम्री च इन्ना बड्डा महान कारनामा कीता ऐ जेदे थमां देश दी युवा पीढी गी प्रेरणा थ्होग। लोकसभा च स्पीकर ओम बिरला होरें बी दिव्या देशमुख हुंदी प्रशंसा कीती ते आखेआ जे पूरा देश उंदी जित्त पर फखर मसूस करा'रदा ऐ। सदन दे दौनें सदने इस्स गल्ला पर बी खुशी जताई जे फिडे महिला शतरंज विश्व कप दे फाइनल च पुज्जने आहिलयां दवें खडारना भारतीय हियां।

